

PLUS tutup laluan di KM 172 arah selatan

JOHOR BAHRU 20 Dis. - PLUS Expressways Berhad menutup laluan bagi semua kenderaan di Kilometer 172 arah selatan antara Tangkak, Johor ke Jasin, Melaka ekoran banjir yang berlaku di Lebuhraya Utara-Selatan di situ.

Pengurus Sektor PLUS Expressways Wilayah Selatan, Roszi Ibrahim berkata, penutupan laluan tersebut dilakukan pada kira-kira pukul 7.30 pagi ini berikutan paras air di lebuhraya tersebut naik kira-kira satu meter.

Beliau berkata, sepanjang 150 meter laluan tersebut ditutup dan pihaknya telah membuat laluan kontra sepanjang 300 meter dari arah utara yang menghubungkan Tangkak ke Jasin.

"Kebetulan laluan yang menghala ke utara agak tinggi berbanding laluan sebaliknya maka kita telah membuat laluan kontra sepanjang 300 meter bagi melancarkan perjalanan dari kedua-dua arah," katanya

ketika dihubungi di sini hari ini.

Menurutnya, PLUS Ronda bersama polis dan Jabatan Pertahanan Awam (JPA3) telah ditempatkan di situ bagi memantau banjir di lebuhraya tersebut di samping mengawal lalu lintas di lebuhraya itu.

Sesak

Dalam pada itu, Jalan Skudai menuju ke arah Kulai sesak berikutan banjir yang berlaku berhampiran kampung Sepakat Jaya di sini awal pagi ini.

Tinjauan *Utusan Malaysia* di kawasan itu mendapati kesesakan lalu lintas bermula kira-kira pukul 8 pagi menyebabkan kenderaan berbaris panjang dari persimpangan lampu isyarat Skudai sehingga ke pasar raya Kipmart, Tampoi.

Bagaimanapun, keadaan trafik kembali pulih apabila anggota polis trafik berjaya mengawal lalu lintas kira-kira pukul 11 pagi ini.